

## Morning Gojri News

25 August 2024

1015Hrs

یوہ آکا شوانی جموں بے باغ علی طاہرتیں خبر سُنو۔

### Mann Ki Baat

وزیر اعظم نریندرمو دی آج سویرے 11 بجے ”من کی با ت“ پروگرام مانہ لوکاں سنگ اپنا خیالات سانجھا کریں گا۔ ماہوار ریڈیو پروگرام گو یوہ اُن گو 113 ووں شمارو ویگو۔ ”من کی با ت“ پروگرام آکاشوانی، دور درشن، اے آئی آر نیوز ویب سائٹ، تے نیو ز آن لائن ایپ ور سُنیو تے دیکھیو جا سکے گو۔ وزیر اعظم غا من کی با ت پروگرام نانہ۔ اس توں علا وہ اے آئی آر نیوز، ڈی ڈی نیوز، پی ایم او تے اطلاعات ونشريات غی وزارت غا یو ٹیوب چینلاں ور وی سُنیو تے دیکھیو جا سکے۔ آکاشوانی غی طرفوں اس پروگرام نانہ بندی نشريات غے فوراً بعد علا قائی زباناں مانہ وی نشر کیو جا ئیگو۔

\*\*\*\*\*

### Politics JK

بھارتی چناؤ کمیشن غی طرفوں جموں کشمیر مانہ اسمبلی چناؤ کرایا جان غا اعلان غے بعد یوٹی مانہ بُن سیا سی سرگرمیں زور پکڑ رہی ہیں۔ گذشتہ پارلیمانی چناواں مانہ وی سیاسی بلچل دیکھی گئی تھی تے بُن اسمبلی چناواں غا اعلان غے بعد سیا سی گرمی مانہ روز بروز باہدو دیکھیو جا رہیو ہے۔ جموں کشمیر غا چناؤ ہمیشہ تیں ہی اپنی مثال آپ رہیا ہیں۔ تے یہ بکھ بکھ محرکات تیں متاثر ہو تا رہیا ہیں۔ جن مانہ سلامتی صورتحال غی اک بڑی للکار رہی ہے۔ آلبتہ گذشتہ پارلیمانی چناواں غے دوران ووٹراں غا جو ش و خروش نانہ دیکھتاں واں آئندہ اسمبلی چناواں مانہ وی خاطر خواہ تعداد مانہ ووٹ کھلیا جان غی اُمید کیجا رہی ہے۔ پہلامرحلہ غا اسمبلی چناؤ، جنوبی کشمیر غی 16 سیٹاں جد کہ جموں ڈویزن غا 3 ضلعان کشتواڑ، ڈوڈہ تے رام بن غی 8 سیٹاں ور آئندہ ستمبر مہینہ غی 18 تاریخ نانہ کرایا جا ئیں گا۔ پہلا مرحلہ غا چناواں واسطے کاغذات نامزدگی پھرن غی آخری تاریخ 27 اگست مقرر کیگئی ہے۔ اجوں توڑی کسی وی بڑی سیا سی جماعت نے اپنا اُمید واراں غو اعلان نہیں کیو ہے۔

\*\*\*\*\*

### BJP Meeting

جموں کشمیر تے بریاناہ مانہ آئندہ ستمبر تے اکتوبر مہینہ مانہ ہون آلا اسمبلی چناواں مانہ اُمید واراں غی فہرست نانہ آخری شکل دین غا سلسلہ مانہ بھارتیہ جنتا پارٹی غی مرکزی چناؤ کمیٹی غی پارٹی صدر دفتر نوی دہلی مانہ اج میٹنگ منعقد کی جا رہی ہے۔ پارٹی ذریعاں نے جانکا ری دیتاں واں دسیو ہے جے پارٹی صدر جے پی نڈھا غی قیادت مانہ یاہ میٹنگ منعقد ہو رہی ہے۔ جس مانہ وزیر اعظم نریندرمو دی، وزیر دفاع

راجناتھ سنگھ تے وزیر داخلہ امت شاہ وی شرکت کر رہیا ہیں۔ اُمید ہے جے پہلا مرحلہ گا جموں کشمیر اسمبلی چناواں مانہہ شرکت کرن آلا بی جے پی اُمید واراں غی فہرست اج رات توڑی جا ری کر دتی جائے گی۔

\*\*\*\*\*

### **NC Congress**

نیشنل کانفرنس تے کانگریس اتحاد ور غیر یقینی غی صورتحال غے بشکار کل پارٹی غی چناؤ سکریننگ کمیٹی غے باندے کانگریس لیڈراں نے یوٹی غا تمام 90 اسمبلی حلقاں واسطے اُمید واراں غی فہرست پیش کر دتی۔ آل انڈیا کانگریس کمیٹی غی سکریننگ کمیٹی غی میٹنگ مقامی کانگریس لیڈراں سنگ منعقد کیگئی۔ جس غی صدارت جموں کشمیر بارے کانگریس پارٹی غا انچارج سکھچندر سنگھ رندھاوا تے جے کے پی سی سی غا صدر طارق حمید قراء کر رہیا تھا۔ پارٹی غا اک لیڈر نے جانکاری دیتاں واں دسیو ہے جے کانگریس غا گجھ لیڈراں نے نیشنل کانفرنس سنگ کیا گیا اتحاد ور تحفظات غو اظہار کیو ہے۔ تے نیشنل کانفرنس غی ایمانداری ور سوال چایا ہیں۔ اُنہاں نے یوہ وی دسیو ہے جے پارٹی غی طرفوں فیصلو کیو گیو ہے جے ڈیموکریٹک پروگریسو آزاد پارٹی غا کسے وی لیڈر غو کانگریس مانہہ خیرمقدم نہیں کیو جائے گو۔ اسے دوران نیشنل کانفرنس غا صدر ڈاکٹر فاروق عبداللہ نے وی سینئر پارٹی لیڈراں سنگ اک میٹنگ منعقد کر غے پارٹی غابکھ بکھ معاملن ور غور کیو گیو۔ جن مانہہ کانگریس سنگ سیٹاں غی تقسیم غو معاملو سر فہرست رہیو۔ نیشنل کانفرنس غا وی کئی لیڈر سیٹاں غی تقسیم ور ناراض دیکھیا گیا۔ تے اُنہاں نے گجھ اسمبلی حلقاں مانہہ سیٹاں غی تقسیم غو پارٹی ور منفی اثر پین غو خدشو ظاہر کیو۔

\*\*\*\*\*

### **PDP**

پی ڈی پی غی صدر محبوبہ مفتی نے کل کہیو ہے جے اُن غی جماعت کانگریس، این سی اتحاد مانہہ مکمل تعاون دیتاں واں تمام اسمبلی سیٹاں مانہہ اس اتحاد غی خاطر چھوڑن واسطے تیار ہے۔ جے کدیں یوہ اتحاد اُن غا ایجنڈا مانہہ تسلیم کرن واسطے تیار ہو جائے۔ محبوبہ مفتی پارٹی منشور غو اعلان کیا جان غا موقعہ و ر اخباری نمائنداں سنگ گل کر رہیں تھیں۔ اپنا منشور مانہہ پی ڈی پی نے بھارت تے پاکستان بشکار سفارتی اقدام کیا جان غی وکالت کرن واسطے کہیو ہے۔ تانجے تنازعہ غو حل کڈھیو جا سکے۔ نالے اعتما د غی بحالی، تے خطہ مانہہ تعاون بدھایا جان غا اقدام کیا جا سکیں۔ اُنہاں نے کنٹرول لائین غے دو پاسے تجارتی تعلقات بحال کرن مانہہ وی پارٹی منشور مانہہ شامل کیو ہے۔ پارٹی منشور مانہہ پی ایس اے، تے یو اے پی اے مانہہ ختم کرن مانہہ شامل کیو گیو ہے۔

\*\*\*\*\*

## Radamization EVMs

جموں کشمیر غا آئندہ اسمبلی چناواں غا سلسلہ مانہہ ضلع جموں مانہہ کل ای وی ایم مشیناں تے وی وی پیٹز غی کامیاب رینڈیمائزیشن یعنی بے ترتیبی سنگ رکھن غو کم انجام دتو گیو۔ آکاش وانی جموں غانمائندہ نے جانکا ری دیتاں واں دسیو بے جے ووٹینگ مشیناں غی بے ترتیبی غو کم ریٹرننگ افسراں تے بکھ بکھ سیا سی جماعتاں گا نمائنداں غے سامنے انجام دتو گیو۔ ووٹینگ مشیناں غی بے ترتیبی غا کم نانہہ ڈیجیٹل طریقہ سنگ انجام دتو گیو۔ جس ور تمام سیا سی جماعتاں غا نمائنداں نے تسلی ظاہر کی۔ اس کم نانہہ نوڈل افسر غی طرفوں چناؤ کمیشن غی رہنما سطور غی بنیا د ور انجام دتو گیو۔ جموں ضلع غا کُل 11 اسمبلی حلقاں غا 1 ہزار 4 سو 97 پولینگ مرکزیاں غا 2 ہزار 2 سو 42 بیلٹ یونٹاں، 2 ہزار 2 سو 42 ہی کنٹرول یونٹاں تے اتنی ہی تعداد مانہہ وی وی پیٹ یونٹاں غی رینڈیمائزیشن یعنی بے ترتیبی غا کم نانہہ انجام دتو گیو۔ بے ترتیبی غا اس عمل غے دوران مُرتب کی گئیں فہرستاں نانہہ بکھ بکھ سیا سی جماعتاں غا نمائنداں غے حوالے کیو گیو۔ تے اس سارا عمل غی چناؤ کمیشن غی طرفوں طے کیا گیا ضابطاں غے مطابق ویڈیو گرافی وی کی گئی۔

\*\*\*\*\*